

Ganadonan di Premio Excelencia den Deporte 2013



ORANJESTAD - Diabierna anochi den e ballroom di Renaissance Convention Center a tuma luga e Premio Excelencia den Deporte 2013. Atleta y dirigentenan nomina hunto cu nan famia a bini hunto pa asina haya e reconocimiento pa nan trabou desplega durante e aña deportivo tras di lomba. Durante e Premio di Excelencia den Deporte

tabata presente Minister di Deporte, Dr. Alex Schwengle, parlamentario, invitado di honor y miembronan di prensa, kendenan a forma e cuerpo di hurado y e ganado di medaya di brons den e Weganan Sur Americano, Stuart Smit. Despues di a inicia cu un bunita show prepara pa e organisadonan a bay over na entrega e premio na esunnan

cu a resalta den e categorianan infantil, hubenil, dirigente y atleta di aña. Tambe a duna un reconocimiento special na dos atleta di Special Olympics Aruba kendenan a destaca aña pasa den nan deporte. E dos atletanan cu a cay den premiacion pa Special Olympics Aruba tabata Darline Gomez den e deporte di landamento y Jermiah Werleman den e deporte di badminton. Remarcabel ta cu e hoben Jermiah Werleman a gana medaya di brons den e Special Olympics World Games aña pasa na Atenas, Grecia. Na e mesun momento a duna un merito di honor na Sandra Croes kende henter su bida a dedica su tempo liber na nos mucha y hobennan den e deporte di basketball. Despues a inicia cu e entrega di e reconocimiento na e atletanan cu a destaca. Den e categoria femenino te cu 13 aña e ganado a resulta e tenista hoben

Ashley Paulina, mientras den e categoria masculino te cu 13 aña tambe e ganado a resulta un tenista esta Patrick Sydow. Pa lora ta e categoria di 14 - 18 aña mester bisa cu e ganado den e categoria femenino a resulta e landado Allyson Ponson, mientras den e categoria masculino es cu a triunfa a resulta e triatlata Renze Postma.

A duna honor tambe pa reconoce un premio pa e dirigente di aña 2013, e persona cu mas a traha den un forma exitoso cu su respectivo atletanan. E premio aki a bay pa drs. Raymundo Dijkhoff di e federacion di Schaak Por ultimo a bay over na e premio maximo esta e atleta di aña. Despues di un momento yen di tension a anuncia e hungado di bowling Kamilah Dammers como Aruba su atleta di aña 2013.

E alegria sigur tabata inmenso cerca tur presente specialmente esunnan di



ARBAS kendenan a grita di alegria. Mas cu claro Kamilah Dammers a ricibi e check di 10.000 florin for di man di Minister di Salubridad y Deporte, Dr. Alex Schwengle. Pa Kamilah esaki tabata su prome reconocimiento como Aruba su atleta di aña. □